
ՀԱՅԱՍՏԱՆԻ ԳՅՈՒՂԱՏՆՏԵՍՈՒԹՅՈՒՆԸ

Մ. Թ. Ա. III – I ԴԴ.

ԳԱՅԱՆԵ ՔՈՉԱՐՅԱՆ

Քաղաքակրթության նոր՝ հելլենիստական փուլ թևակոխած տարածաշրջանի գերհզոր ուժերի (Սելևկյաններ, Պարթևներ, Հռոմ) ռազմաքաղաքական բարդ փոխհարաբերությունների անկայուն մթնոլորտը Հայաստանին պարտադրում էր աննահանջ պայքար մղել հանուն պետականության ամրապնդման:

Պետական հզոր համակարգի կայացման գործընթացում առաջնահերթ անհրաժեշտություն է տնտեսական համակարգի ճշգրիտ, լիարժեք կազմակերպումը: Տվյալ ժամանակաշրջանում երկրի տնտեսության առաջընթացն ապահովող հիմնարար ուղղությունը գյուղատնտեսության զարգացումն էր:

Ցարդ գիտական շրջանառության մեջ առկա հնագիտական սուղ նյութերի և գրավոր աղբյուրների ընձեռած տվյալների համեմատական վերլուծությամբ փորձենք վերականգնել Հայաստանի գյուղատնտեսության զարգացման ընդհանրական պատկերը՝ Երվանդունիների երկրորդ թագավորության և Արտաշիսյան արքայատոհմի գործունեության ժամանակահատվածում (մ. թ. ա. III– I դդ.)¹:

Նախորդ՝ մ. թ. ա. VI– IV դդ. ժառանգված հողի մշակման, բերքահավաքի, մթերքի վերամշակման աշխատանքային գործիքների հայտնի հավաքածուն² համալրվում է քննվող ժամանակաշրջանի հուշաձևանների պեղումներով հայտնաբերված հնագիտական համարժեք նյութերով (կացնաձև ցաքատ, բահ, պոչուկավոր ու կոթառավոր մանգաղներ, խոշոր կորաշեղբ դանակներ, ակիշներ), ինչպես նաև ունկավոր սանդերով, լճակավոր «հրվող» աղորիքներով, տարապաններով:

Ըստ հնէաբուսաբանական տվյալների՝ Հայկական լեռնաշխարհում ավանդաբար մշակվող հացազգիների, ոլոռազգիների տեսականին նեոլիթ-էնեոլիթից ի վեր շարունակաբար հարստացել է (ցորեն, գարի, կորեկ, վարսակ, տարեկան, հաճար, ոսպ, նուտ, սիսեռ)³: Երկրում արտադրվող հացամթերքի

¹ Հայաստանի գյուղատնտեսության զարգացման ընթացքը նախորդ՝ Երվանդունյաց առաջին թագավորության և Աքեմենյան սատրապության ժամանակաշրջանում տե՛ս Գ. Քոչարյան. Հայաստանի գյուղատնտեսությունը մ. թ. ա. VI–IV դդ.– ՊԲՀ, 2010, -2, էջ 169–171:

² Տե՛ս նույն տեղում, էջ 172:

³ Հնէաբուսաբանական տվյալների մասին տե՛ս Գ. Н. Лисицына, Л. В. Прищепенко. Палеоэтноботанические находки Кавказа и Ближнего Востока. М., 1977, с. 62–69, 71–73, 91–95; Լ. Հոլմեյեր. Առատաշենի նեոլիթյան բնակատեղիի հնաբուսաբանական նյութերը.– Հին Հայաստանի մշակույթ, XIII, Երևան, 2005, էջ 51–53, Ժ. Խաչատրյան. Քաղաքամայր Արտաշատը պատմահնագիտական հետազոտությունների լույսի ներքո.– ՊԲՀ, 2007, -2, էջ 20:

մեծաքանակ ծավալների առկայությունը փաստված է հնագիտական տվյալներով (մեկ կամ մի քանի հաղորդակից հորեր, քարաշար, 2-5 տոննա տարողությամբ ամբարներ, թոնիրներ, սաճեր, ակիշներ և այլն)⁴ և Տիգրան Մեծի գործի համար ամբարված «հացի պաշարների» մասին Պլուտարքոսի վկայությամբ⁵:

Հայկական լեռնաշխարհի անտառներում մրգատու ծառատեսակների զանգվածային առկայությամբ պայմանավորված՝ վաղ բրոնզեդարից զարգացող այգեպտղաբուծության համալրվող հարուստ տեսականու (ծիրան, սալոր, խնձոր, դեղձ, ալոճ, բալ, կեռաս, հոն, նուռ, տանձ, սերկևիլ)⁶ բազմազանությունն էր, թերևս, որ դրդեց Ստրաբոնին մեր հովիտները «արտակարգ պտղավետ»⁷ բնութագրել:

Հնագիտական և հնէաբուսաբանական հետազոտությունների տվյալներով հաստատված՝ մ. թ. ա. V–IV հազ. ի վեր Հայկական լեռնաշխարհում խաղողագինեգործության մշակույթի զարգացման ավանդույթները⁸ ավելի ուշ փաստագրված են նաև գրավոր վկայություններով: Ստրաբոնի հաղորդումը⁹, որ Կուր-արաքսյան միջագետքի (Շակաշենե, Արաքսենե) հովիտներում խաղողի որթատունկից ստանում էին 1 մետրետ (=39,5 լ) գինի, վստահաբար կարելի է վերագրել Հայաստանի հովտային ու նախալեռնային գոտուն ընդհանրապես¹⁰: Խաղողի մեծաքանակ բերքի վերամշակման անհրաժեշտությամբ էր պայմանավորված բնակելի տների տնտեսական հարկաբաժնի հնձաններից զատ, այգեմիջյան կամ հուսքի մերձակայքում գինու արտադրության կառույցների առկայությունը¹¹: Քննվող

⁴ Յորենի, գարու, վարսակի, սիսեռի մնացորդներով ամբարների, հաց թխելու սաճերի մասին տե՛ս նաև Ն. Խաչատրյան. Ուրվագծեր Շիրակի դաստակերտի մ. թ. ա. 1-ին դարի առևտրատնտեսական հարաբերությունների.– Շիրակի պատմամշակույթային ժառանգությունը. Հանրապետական առաջին գիտաժողով. Զեկուցումների թեզիսներ, Գյումրի, 1994, էջ 28-30, ն ու յ ն ի՝ Անտիկ շրջանի խոհանոցային խեցեղենի գործառական որոշ խնդիրների շուրջ.– Գիտական աշխատություններ, V, Գյումրի, 2002, էջ 107-108:

⁵ Плутарх. Избранные жизнеописания (այսուհետև՝ Плутарх). Сост. и примеч. М. Томашевской. М., 1987, Лукулл, XXXI.

⁶ Г. Н. Лисицына, Л. В. Прищепенко. *Նշվ. աշխ.*, էջ 63, 68, 71–73, A. Bobokhyan. Kommunikation und Austausch im Hochland zwischen Kaukasus und Taurus, ca. 2500–1500 v. Chr. Bd. 2. Oxford, 2008, S. 81–84, 313 und etc.

⁷ Страбон. География в 17 книгах (*ՅԵԼԹՃՍՆ*՝ Տրաբոն). Пер., статья и комм. Г. А. Стратановского. Л., 1964, XI, XIV, 4.

⁸ Մանրամասն տե՛ս Գ. Ս. Թ ու մ ա ն յ ա ն. Հնձանային մշակույթը Հայաստանում, Երևան, 2008, էջ 8-38 և այլն:

⁹ Страбон, II, I, 14; XI, VII, 2.

¹⁰ Տե՛ս նույն տեղում, XV, I, 58.

¹¹ Հմմտ. Արմավիրի ագարակատան հնձանը, Գետառի հովտում՝ Ավան-Առինջի խաղող ճգնելու առագաստի կրասավաղի բեկորները, քաղցուի գուռը, Աշտարակի «Խոջաբաղերի» և «Մուղնու թառի» այգեմիջյան հնձանները, Քասաղի աջափնյա կիրճահայաց մասում՝ Աղթամիրի «Ժայռափոր, կավածեփ ավազանները, գինու հորերը», Ամբերդ գետի առափնյա բարձունքին՝ Ագարակի ժայռակերտ հնձանների համալիրը և այլն (տե՛ս Գ. Ս. Տիգրաջյան, Բ. Ս. Կարապետյան. Արմավիրի 1977-1978 թթ. պեղումները.– ՊԲՀ, 1979, -4, էջ 251-255, նկ. 1-3, А. Демирханян. Северо-восток Еревана в эпоху Арташесидов. Ереван, 2010, с. 56; Գ. Ս. Թ ու մ ա ն յ ա ն. *Նշվ. աշխ.*, էջ 29, 31-33, Հ. Սիմոնյան, Հ. Գ ա շ, Ա. Ժ ա մ կ ո չ յ ա ն և ուրիշներ. Հայ-բելգիական համատեղ պեղումներ Ոսկեվազում.– Հայաստանի Հանրապետությունում 1993-1995 թթ. հնագիտական հետազոտությունների արդյունքներին նվիրված 10-րդ գիտական նստաշրջան. զեկուցումների թեզիսներ. Երևան, 1996, էջ 68):

ժամանակի բնակավայրերում հայտնաբերված՝ բոլորշի ակոսատվակով ու ծորանով սալաքար-տարապանները հաստատում են հույժի վերամշակման գործընթացի կատարելագործումը¹² գինեգործության մշակույթի զարգացման մ. թ. ա. II–I դդ. շրջափուլում:

Այս ժամանակահատվածի խեցեղեն արտադրանքում գինու պահեստավորման և տեղափոխման համար նախատեսված ավանդական տարայի՝ կարասների, կողքին նորաձև տափաշների քանակական ակնառու գերակշռությունը՝ գինեգործական արտադրանքի ծավալների զգալի աճի ցուցանիշ է: Հայտնաբերված տափաշների նշանակալի քանակը, բարձր որակը, ձևի կայունությունը, գունազարդման ընդհանրությունը, տարողությունների նույնաչափությունը՝ բարձրորակ գինու մեծածավալ արտադրանքը ապրանքափոխադրական հատուկ տարայով շրջանառության մեջ դնելու ավանդույթի զարգացման ապացույց են¹³: Միջազգային տարանցիկ առևտրի մայրուղիների խաչմերուկում հեղինակական դարաշրջանի Հայաստանի մասնակցությունը գինու առքուվաճառքին վավերացված է բազմաթիվ կնքադրոշմներով, ինչպես նաև ամֆորաների, մետաղադրամների առկայությամբ¹⁴:

Ըստ հնէաբուսաբանական ուսումնասիրությունների տվյալների՝ Հայկական լեռնաշխարհը վաղ էնեոլիթից ի վեր հայտնի էր ձիթատու բուսատեսակներով¹⁵: Մ. թ. ա. III–II հազ. արքադական սեպագիր աղբյուրների վկայությամբ՝ այստեղից արտահանվել են կտավատ, պիստակենի, ձիթապտուղ, հավանաբար, և ձիթահումք՝ անուշահոտությունների պատրաստման համար¹⁶: Քննվող ժամանակաշրջանի հատուկ ապրանքափոխադրական տարայով կտավատի, ինչպես նաև դառը նշի բարձրորակ յուղի արտահանման պատմահնագիտական տվյալները¹⁷ ձիթամթերքի հավելյալ

¹² Քաղցուն առավելագույնս մզելու համար՝ առագաստում ոտքերով արդեն տրորված խաղողի գանգվածը ճզմվել է տարապանի վրա: Տարապաններ (երբեմն նաև բնորոշ շարժական ավազան-քարե գուռերով) հայտնաբերվել են Արմավիրում, Դվինում, Արտաշատում, Զվարթնոցում, ներկայիս՝ Նորագավթում, Այգեշատում, Եղեգնաձորում, Նախիջևանում և այլուր (Գ. Մ. Թ ու մ ա ն յ ա ն. նշվ. աշխ., էջ 29-30, 33-34):

¹³ Ավանդույթ, որի վաղեմությունը փաստագրված է դեռևս Մարիի թագավորության մ. թ. ա. XVIII դ. սեպագիր տեքստերում: Հայկական լեռնաշխարհի վերինեփրատյան շրջաններից լիստուկ անոթներով ղեռնու մ. թ. ա. II հազ. գինի է առաքվել Միջագետք (տե՛ս А. В о б о к х я н. Նշվ. աշխ., էջ 83-84 և այլն):

¹⁴ Ж. Х а ч а т р я н, О. Н е в е р о в. Архивы столицы древней Армении Арташата. Ереван, 2008, с. 43, 85-89:

¹⁵ Г. Н. Л и с и ц ы н а, Л. В. П р и щ е п е н к о. Նշվ. աշխ., էջ 68, 72-73, 91-95, Գ. Գ. Ք ո չ ա թ յ ա ն. Նոր նյութեր Դվինի հեղինակական բնակավայրի վերաբերյալ.– ՀԽՍՀ ԳԱ «Լրաբեր հասարակական գիտությունների», 1990, -2, էջ 103, Ժ. Խ ա չ ա տ թ յ ա ն. նշվ. աշխ., էջ 20:

¹⁶ Տե՛ս А. В о б о к х я н. Նշվ. աշխ., էջ 81-84 և այլն:

¹⁷ Բենիամինում՝ Արտաշիսյանների արքայապատկան դաստակերտում հայտնաբերված տափաշի շրջ (գնտված հում կավի գանգվածով՝ վրան քուղի հետքեր և արտադրողի կամ մաքսային երկու տարբեր կնքադրոշմ), հավանաբար, օգտագործվել է կտավատի յուղի տեղափոխման համար: Ազգագրական նյութերից դատելով՝ այն մշտապես բավարարել է բնակչության «տնտեսական, կենցաղային ու հոգևոր պահանջները», փոխանակվել հովտային շրջանների բնակիչներով կամ արտահանվել երկրից դուրս (տե՛ս Հ. Խ ա չ ա տ թ յ ա ն. Ուրվագծեր Շիրակի դաստակերտի մ. թ. ա. 1-ին դարի առևտրատնտեսական հարաբերությունների, էջ 29-30, Մ. Հ ո բ ո ս յ ա ն. Ձիթագործությունը Շիրակում.– Շիրակի պատմամշակութային ժառանգությունը. Հանրապետական երրորդ գիտաժողով. Զեկուցումների հիմնադրույթներ. Գյումրի, 1998, էջ 40-41): Դառը նշի յուղի մասին տե՛ս Ռ. Փ ա լ ա ն ջ յ ա ն. Հին

արտադրանքի ապրանքային բնույթի վկայություններն են: Քնջութի, կանեփի, ձիթապտղի, ընկույզի, նշի մշակությունը վկայող հնէաբուսաբանական տվյալները, հնագիտական նյութերում՝ սրանց վերամշակման միջոցները¹⁸, կանեփաթել ամրացանցով խեցանոթների¹⁹ ու բազմաթիվ ճրագների առկայությունը հավաստում են՝ հելլենիստական դարաշրջանի Հայաստանում սնունդ, թելանյութ, ճրագալույս ապահովող ձիթագործության ավանդական մշակույթի զարգացումը²⁰:

Հնէակենդանաբանական նյութի ուսումնասիրությամբ հաստատված ընտանի կենդանիների ավանդաբար պահպանված կազմը (ցուլ/կով, ոչխար, այծ, խոզ, ձի, կուլան, շուն) և կաթի, մսի, բրդի, կաշվի մշակման միջոցների հնագիտական նյութերը (կովկիթներ, ձուլմներ, դանակներ, խուզի մկրատներ, թեշիկի գլխիկներ, մանածագործի դագգահի կախիկներ, մախարներ և այլն) համալրվել են բարեկարգ գոմերով (քարածածկ հատակ՝ գոմադրի եզրային, գոգավոր «առվակ», մեկական կամ զույգ հանդիպակաց մտորքներ)²¹ և մեծաքանակ անասնակերի պահեստավորման կցակառույցներով: Ձիու, կուլանի ոսկրաբանական մնացորդները, ավանակի պատկերը մաքսային կնքադրոշմների վրա²², ինչպես նաև հազար ձի լծասարքով ու հազար ջորի Անտիոքոս III Մելնկյանին՝ Օռփքի Քսերքսես թագավորի տված հարկի մասին Պոլիբիոսի հաղորդումը²³ հավաստում են մեր տարածաշրջանում (մ. թ. ա. III–II հազ. ի վեր փաստագրված) բեռնակիր և հեծկան ավանդական կազմի²⁴ տեղական առկայությունը:

Տիգրան Մեծի գործի գլխավոր հարվածային ուժը՝ ծանրազեն զրահապատ հեծելագործ, Պլուտարքոսի վկայությամբ՝ «իր ահարկու տեսքով և հսկայական քանակությամբ» զարհուրեցնում էր թշնամուն²⁵: Լայնածավալ

Հայաստանը օժանելիքի միջազգային առևտրի ոլորտում.– Հին Հայաստանի մշակույթը, XII, Երևան, 2002, էջ 72:

¹⁸ Սանդերը, հավանգները, ադորիքները, տարապաններն ու քարե տաշտերը լայնորեն կիրառվել են նաև ձիթատու որոշ բուսատեսակների վերամշակման համար:

¹⁹ Հ. Խ ա չ ա տ ր յ ա ն. Անտիկ շրջանի խոհանոցային խեցեղենի գործառական որոշ խնդիրների շուրջ, էջ 107–108:

²⁰ Հմմտ. քաթանե կտավի դաջվածքի հետքերը մ. թ. ա. III հազ. խեցեղենի վրա, քնջութի վերամշակումը վանտոսայան ձիթհաններում, «քնջութի և դառը նշի և բնեկնի յուղի» և օսրանցից պատրաստված մեռնիօ գործածությունը մ. թ. ա. V–IV դդ. և այլն (Գ. Ե. Արեշյան. Նոր նյութեր Հայաստանի մ. թ. ա. 3-րդ հազարամյակի երկրագործական տեխնիկական կուլտուրաների մասին.– Հայկական ՄՍՀ-ում 1977–1978 թթ. դաշտային հնագիտական աշխատանքների արդյունքներին նվիրված զեկուցումների թեզիսներ, Երևան, 1979, էջ 13, Զ. Ղ ա ս ա բ յ ա ն. Ձիթագործությունը Ուրարտում.– ՀՄՄՀ ԳԱ «Տեղեկագիր» հասարակական գիտությունների, 1957, -4, էջ 107–116, Ք ս ե ն փ ո ն. Անաբասի, թարգմանությունը Մ. Կրկյաշարյանի, Երևան, 1970, IV, IV, 13):

²¹ Н. Манасерян, Л. Мирзоян. Коллекции субфоссильных млекопитающих.– Հին Հայաստանի մշակույթը, XIII, Երևան, 2005, էջ 202–203, Հ. Խ ա չ ա տ ր յ ա ն. Ուրվագներ Շիրակի դաստակերտի մ. թ. ա. I-ին դարի առևտրատնտեսական հարաբերությունների, էջ 29:

²² Ж. Хачатрян, О. Неверов. Նշվ. աշխ., էջ 94–95:

²³ Պ ո լ ի բ ի ո ս. Պատմություն, Մ. Մ. Կրկյաշարյանի թարգմանությամբ.– Հայ ժողովրդի պատմության քրեստոմատիա, հ. 1, Երևան, 1981, VIII, 25:

²⁴ Մ. Կ. Մ ե ժ լ ու մ յ ա ն. Լոռի-բերդի դամբարանադաշտի հնէակենդանաբանական նյութը (1989–1990 թթ.)– Հայաստանի Հանրապետությունում 1989–1990 թթ. դաշտային հնագիտական աշխատանքների արդյունքներին նվիրված գիտական նստաշրջան. Ձեկուցումների թեզիսներ. Երևան, 1991, էջ 46:

²⁵ П л у т а р х. Лукулл, XXXI.

երկրի անառիկությունն ապահովող բանակի ծանրագեն հեծելագորին անհրաժեշտ՝ մարմնեղ, պնդակազմ, ուժեղ, տոկուն, իսկ թեթևագենին՝ առույգ, դյուրաշարժ, սրբնթաց հեծկանների բազմազանություն ու քանակ էր ապահովում ցեղային ձիաբուծությունը:

Այսպիսով՝ քննվող ժամանակաշրջանի երկրագործության և անասնապահության ավանդական ճյուղերի շարունակական զարգացման վերակազմված ընդհանրական համայնապատկերում ակնհայտ է գյուղատնտեսական արտադրանքի ծավալների և շրջանառության նշանակալի աճի միտում:

Տարածաշրջանի ռազմաքաղաքական իրադրության անբարենպաստ պայմաններում Երվանդունիների երկրորդ թագավորությունը մ. թ. ա. III դ. 70-ական թվականներից սկսած՝ հզորացող հարևաններին տարածքներ զիջեց և անկարող եղավ պահպանել երկրի լիակատար անկախությունը:

Մեծ Հայքի գրեթե ողջ տարածքն ընդգրկող վերամիավորված երկրի քաղաքական անկախությունն ամրապնդելու, պետական ռազմատնտեսական հզոր համակարգ հիմնելու նպատակով՝ Երվանդ Վերջինին հաջորդած Արտաշես Առաջինը (մ. թ. ա. 189–160 թթ.) ձեռնամուխ եղավ տնտեսական բնույթի ծրագրային լայնածավալ բարենորոգումների իրագործմանը²⁶:

Կենտրոնական իշխանության նախաձեռնությամբ՝ ռոռգելի բարեբեր հովիտներում, մայրուղիների և սրանց ճյուղավորումների երկայնքին, քաղաքների ու տարաբնույթ բնակավայրերի խտացման գործընթացն²⁷ ընդգրկում էր նաև գյուղատնտեսության զարգացումն ապահովող ռոռգման գործող համակարգի աննախադեպ ընդարձակում²⁸:

Գյուղատնտեսական ռոռգելի լայնածավալ հողատարածքներով են օղակվում քաղաքներն ու քաղաքատիպ ավանները, ձևավորվում է քաղաքամերձ տնտեսական գոտի՝ խորա²⁹: Վաղ միջնադարյան գրավոր աղբյուրներում հիշատակված, հելլենիստական ժամանակաշրջանի վաղեմություն ունեցող բնութագրումները³⁰ վկայում են քա-

²⁶ Տե՛ս Գ. Ք ը չ ա ը յ ա ն. Արտաշես Ա Բարին որպես հզոր պետականություն կերտող (կերպարային դիմանկարի վերականգնման փորձ). – Գիտական աշխատություններ, III, Գյումրի, 2000, էջ 22-27:

²⁷ Մեծ Հայքի Միջնաշխարհում Արտաշես Ա-ը կառուցեց մայրաքաղաք Արտաշատը, երեք Զարեհավան, երկու Զարիշատ, Արքսատա, Արտամատ քաղաքները, վերակառուցվեցին և բնակեցվեցին հնագույն բնակատեղիներ, առաջացան քաղաքատիպ ավաններ, դաստակերտներ, տաճարական միավորումներ և այլն (տե՛ս նույն տեղում):

²⁸ Վանտոսայան ժամանակներից ի վեր պարբերաբար նորոգվող ու համայրվող ջրանցքների համատարած ցանցերը՝ Արարատյան դաշտում, Վանի ավազանում, Մշո-Մանազկերտի-Բասենի, Երզնկայի դաշտերում և այլուր տե՛ս Գ. Ք ը չ ա ը յ ա ն. Հայաստանի գյուղատնտեսությունը մ. թ. ա. VI–IV դդ., էջ 169-171:

²⁹ Հնագիտական հետազոտություններով փաստված՝ Արմավիրը, Արտաշատը, Վարդգեսավանը սպասարկող մերձքաղաքային գոտիների մասին տե՛ս Գ. Ա. Т и р а ц я н. Культура древней Армении. Ереван, 1988, с. 80–82; Գ. Ք ը չ ա ը յ ա ն. Ոստան Հայոց գավառը Արտաշատի մերձքաղաքային տնտեսական տարածք.– ՀՀ ԳԱԱ «Լրաբեր հասարակական գիտությունների», 1998, -2, էջ 172-175, Ժ. Խ ա չ ա տ ը յ ա ն. նշվ. աշխ., էջ 20, Գ. Ք ը չ ա ը յ ա ն. Մոխրարլուր հնավայրը (անտիկ շերտի բնութագիրն ըստ 1975, 1977 թթ. պեղումների արդյունքների). – Հուշարձան, տարեգիրք Դ – Ե, Երևան, 2008, էջ 160-168:

³⁰ «...գմեճն Արտաշատ հանդերձ ասանօք իւրովք», «...գնահանգն Արտաշատու և զԱրտաշատս ինքնին գլխովին, և զամենայն գեղս և զավանս, որ շուրջ գնովաւ էին» (Եղիշէ. Վասն Վարդանայ եւ

դաք + խորա գույզի վարչատնտեսական մեկ ամբողջություն լինելը: Արքայի վարած ներքին քաղաքականությամբ, ազատ համայնականների մշակած մեծաքանակ բնամթերքի կուտակումով, խորան վերածվում էր քաղաք-կենտրոնի տնտեսական ներուժն ապահովող շտեմարանի, դառնում «համբարանոց ուտելիքի համար»³¹:

Արտաշես Ա-ը երկրի հաղորդակցության փոխադրումների և առաքումների ցամաքային ուղիների ընդարձակումն ամբողջացրեց՝ սահմանելով «ի ծովակս աշխարհիս նաւագնացութիւնք» և «ի վերայ գետոց ճանապարհորդութիւնք»³²: Այսպիսով՝ քաղաք-խորա-ճանապարհ կայացած համալիրը խթանում է մասնագիտացված (հացագործական, խաղողագինեգործական, ձիթագործական, ձիաբուծական և այլն) տնտեսությունների զարգացումը, նպաստում միջշրջանային տնտեսական առնչությունների աշխուժացմանը: Արտաշեսյան արևատական բարեփոխումների ծավալուն գործընթացի արգասիքը՝ քաղաք-խորա-ճանապարհ համալիրի լայն տարածմամբ, միջազգային տարանցիկ առևտրի մայրուղիների ճյուղավորված ցանցի կայացումն էր, այն է՝ երկրի քաղաքայնացումը³³:

«Յետ ամենայն առաքինութեանց և գործոց ուղղութեանց Արտաշիսի, հրամայե զսահմանս գիւղից և ազարակաց որոշել» (ընդգծումը – Գ. Ք.), երկրով մեկ հաստատել սահմանաքարեր³⁴:

Նոր հողեր ձեռք բերած, բազմամարդացված «մեր աշխարհում» ուռճացող նորելուկ ռազմավարչական ավազանին պետությանը մատուցած ծառայությունների դիմաց ստացած իր հողատիրությունները փորձում էր առավելագույնս ընդարձակել ի հաշիվ գյուղական համայնական հողերի: Ձևավորված հողային հարաբերություններում համայնական հողատիրությանը սպառնացող վտանգը կանխելու նպատակով արքան՝ հողի գերագույն սեփականատերը, որոշակիորեն զատում է գյուղերի = համայնական հողերի և ազարակների = մասնատիրական տիրությունների սահմանները³⁵ (արամեատառ) պարզնագրի հստակ բանաձևով՝ «Արտաշես արքան ... բաժանեց հողը ... միջև ...»³⁶:

Հայոց պատերազմին, Երևան, 1989, էջ 136, 158): Երվանդի քաղաքը, Արտազերս բերդաքաղաքը և սրանց «յուտեստ» տրված գավառների մասին տե՛ս Մո վ ս ի ս ի Խ ո ռ ե ն ա ց լ ո յ Պատմություն Հայոց (այսուհետև՝ Մո վ ս է ս Խ ո ռ ե ն ա ց ի), աշխատություններ Մ. Արեղեան և Ս. Հարությունեան, Տիգրիս, 1913, II, Ղ, Փ ա լ ս տ ո ս ի Բ ի լ զ ա ն դ ա ց լ ո յ Պատմություն Հայոց (այսուհետև՝ Բ ո լ զ ա ն դ), բնագիրը Բ. Պատկանյանի, Երևան, 1987, IV, ԺԹ: Գ. Սարգսյանը նշում է, որ «երևույթը հին է և ծագում է հելլենիստական շրջանից» (Հայ ժողովրդի պատմություն, հ. I, Երևան, 1971, էջ 660-661):

³¹ Տե՛ս Բ ո լ զ ա ն դ, IV, ԺԹ:

³² Մ ո վ ս է ս Խ ո ռ ե ն ա ց ի, II, ԾԹ:

³³ «... քաղաքների համակարգը և ճանապարհների ցանցը՝ կապված միջազգային ճանապարհներին» տե՛ս Ա. Ջ ա ղ յ ա ն. Ակնարկներ հին և միջնադարյան քաղաքաշինության պատմության, Երևան, 1986, էջ 26-27 և այլն:

³⁴ Մ ո վ ս է ս Խ ո ռ ե ն ա ց ի, II, ԾԹ:

³⁵ Խնդրի լուսաբանումը տե՛ս Գ. Ս ա ղ յ ա ն. Հելլենիստական դարաշրջանի Հայաստանը և Մովսես Խորենացին, Երևան, 1966, էջ 194-197:

³⁶ «Արտաշիսյան սահմանաքարեր» գտնվել են՝ Գեղարքունիքում (Սևանի ավազանի հարավարևմտյան հատվածում՝ 10), Սյունիքում (Բշխանասարի ստորոտում՝ 1). Վարաժնունիքում (Թեղուտ գյուղից հյուսիս՝ 2), Վերին Տաշիրում (Մայիտակում՝ 1). սրանց մասին և համապատասխան գրականություն տե՛ս Գ. Տ ի ղ ա ց յ ա ն. Արտաշես I-ի ևս մեկ նորագյուտ արամեական արձանագրություն.– ՊԲՀ, 1977, -4, էջ 254-259, Ռ. Բ ի շ ո ն ե, Հ. Հ ա կ ո ղ յ ա ն և ուրիշներ. Արտաշես արքայի նորահայտ սահմանաքարը Մարուխանից.- Հին Հայաստանի պատմության և մշակույթի հարցեր (Գ. Ա. Տիրացյանի հիշատակին նվիրված գիտաժողովի զեկուցումներ). Երևան, 2001, էջ 79-82, Ս.

Արտաշես Ա-ը իր ագրարային հետևողական քաղաքականությամբ՝
 – պահպանում է համայնքի՝ հարկատու միավորի, ամբողջականությունը,
 – նորոգում է պետական հարկային համակարգը,
 – ապահովում է հետևակ գործի հիմնական մասը,
 – օրինականացնում է նորընծա ռազմավարչական ազնվականության սեփականատիրական իրավունքները,
 – զսպում է մասնատիրական տիրույթների արագ ընդարձակման միտումը,
 – ստեղծում է կենտրոնական իշխանության համար հուսալի ամուր հենարան:

Արտաշես Ա-ի տնտեսական քաղաքականության անկյունաքարը հանդիսացող հողային բարենորոգումն ընդգրկեց հասարակության հայտնի բոլոր շերտերը, կազմակերպեց հողից առավելագույն եկամուտ ապահովող տնտեսություն և որպես արդյունք՝ «ի ժամանակս Արտաշեսի ոչ գտանել էրկիր անգործ յաշխարհիս Հայոց, ո՛չ լեռնային և ո՛չ դաշտային, յադագս շինութեան երկրիս»³⁷:

Արտաշես Ա-ի տնտեսական ճշգրիտ կազմակերպված, կայացած համակարգն էլ ավելի ամրապնդվեց Տիգրան Մեծի վարած հետևողական քաղաքականությամբ: Հայաստան գաղթեցված բնակչության զանգվածային վերաբնակեցումներով³⁸ յուրացվեցին նաև գյուղատնտեսական հսկայածավալ տարածքներ, ավելացվեց հարկատու ու զինապարտ բնակչության թվաքանակը, ստեղծվեցին բուն թագավորության պետական եկամուտների սրբնթաց աճի, տնտեսական ու ռազմական գործեղացման անհրաժեշտ նախադրյալներ³⁹, որով ապահովվեց տարածաշրջանում Մեծ Հայքի միջազգային դերի տևական կարևորությունը⁴⁰:

Հ մ ա յ ա կ յ ա ն. Արտաշեսյան սահմանաքարերի շուրջ.– Հայաստանի հնագույն մշակույթը 2. Երևան, 2002, էջ 72-75, Ն. Հ ա գ է յ ա ն, Հ. Հ ա կ ո բ Յ ա ն, Ս. Հ մ ա յ ա կ յ ա ն. Երկու նոր Արտաշեսյան սահմանաքար Վարդենիկից.– Հայաստանի հնագույն մշակույթը 2, էջ 76-77: Շիրակում (Բենիամինում՝ 2, Շիրակավանում՝ 2) հայտնաբերված առանց գրի կոթողների մասին տե՛ս Փ. Тер-Мартиросов. Памятник классической античности Армении.– «Բանբեր Երևանի համալսարանի», 1993, -3, էջ 66:

³⁷ Մ ո վ ս ե ս Խ ո թ ե ն ա ց ի, II, ԾԶ:

³⁸ Հայաստան են գաղթեցվել՝ Կապադոկիայի, Փոքր Ասիայի հելլենիստական քաղաքների բնակչությունը, ինչպես նաև կորդվացիներ, ադիաբենցիներ, ասորիներ և այլն. տե՛ս Ա պ պ ի ա ն ո ս. Հռոմեական պատմություն XII, Ս. Մ. Կրկյաշարյանի թարգմանությամբ.–Հայ ժողովրդի քրեատմատիա, Միհրդատական, 67, С т р а б о н, XI, XIV, 15; П л у т а р х. Лукулл, XXVI.

³⁹ Հիմնավորումը մանրամասն տե՛ս Ռ. Մ ա ն ա ս ե թ Յ ա ն. Տիգրան Մեծ. Հայաստանի պայքարը Հռոմի և Պարթևստանի դեմ, Երևան, 1987, էջ 92, 93 և այլն:

⁴⁰ Հայաստանի բազմադարյան պատմության տևական հզորության այս ժամանակաշրջանի հնագիտական ուսումնասիրության ներկա մակարդակն առավել խոր մասնագիտական վերլուծության հնարավորություն չի ընձեռում:

СЕЛЬСКОЕ ХОЗЯЙСТВО АРМЕНИИ
В III–I ВВ. ДО Н. Э.

Г А Я Н Э К О Ч А Р Я Н

Р е з ю м е

Историко-археологическим исследованием выявлена очевидность тенденции значительного роста объема и торгового оборота продукции традиционных отраслей земледелия и скотоводства в Армении в III–I вв. до н. э. Бурное развитие сельского хозяйства страны связано с экономической политикой Арташеса I. Результатом его радикальных экономических реформ явилось разветвление сети международных транзитных торговых магистралей, распространение системы город–хора–дорога, то есть урбанизация всей страны. Четко организованная экономическая система Арташеса I еще больше укрепилась при Тигране Великом – создавались предпосылки экономического и военного могущества Великой Армении для длительного выполнения ее значительной роли на международной арене.

THE AGRICULTURE OF ARMENIA
IN THE 3rd – 1st CENTURIES B. C.

GAYANE KOCHARYAN

S u m m a r y

According to the materials of historical and archaeological research became obvious the trends in significant growth and trade of products of traditional industries of agriculture and animal husbandry of Armenia in the 3rd–1st centuries B. C. The rapid development of agriculture in the country was due to Artashes the First's economic policy. The result of his radical economic reforms was the forming of extensive network of international transit trade routes, spreading of the system city–khora–road, i.e. urbanization throughout the country. Well-organized economic system by Artashes the First was further strengthened by Tigran the Great – preconditions for economic and military power of Greater Armenia for long-term performance of its significant role in the international arena were created.